



Broj/ Број : 02/2-50-1-69-35/05  
Sarajevo/ Сарајево : 28. 6. 2005.

## **Z A P I S N I K**

### **35. sjednice Komisije za vanjsku i trgovinsku politiku Doma naroda Parlamentarne skupštine BiH održane 28. 6. 2005.**

Tridesetpetu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvaio je predsjedavajući Komisije Hasan Čengić.

Sjednici su prisustvovali svi članovi Komisije: Hasan Čengić, Anto Spajić, Vinko Radovanović, Velimir Jukić, Osman Brka i Ruža Stojanović, kao i Jadranko Tomić, sekretar Doma naroda.

Osim navedenih, sjednici su, u svojstvu predstavnika predlagača, prisustvovali: g. Zdravko Šavija, savjetnik ministra komunikacija i prometa; g. Kojo Koprivica, pomoćnik ministra u Ministarstvu komunikacija i prometa; NJ. E. ambasador Michael Humphryes, NJ. E. Martin Ney, viši zamjenik visokog predstavnika u Bosni i Hercegovini;

Sjednicom je predsjedao predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio sljedeći:

## **DNEVNI RED**

1. Usvajanje Zapisnika sa 33. sjednice Komisije;
2. Prijedlog zakona o Javnom radio-televizijskom sistemu Bosne i Hercegovine – predlagač Vijeće ministara BiH;
3. Prijedlog zakona o željeznicama Bosne i Hercegovine - predlagač Vijeće ministara BiH;
4. Prijedlog zakona o Službi za poslove sa strancima – predlagač Vijeće ministara BiH;
5. Saglasnost za ratifikaciju Sporazuma između Visokog predstavnika za Bosnu i Hercegovinu i Bosne i Hercegovine o uspostavi Ureda registrara Odsjeka i za ratne zločine i Odsjeka II za organizirani kriminal, privredni kriminal i korupciju krivičnog i apelacionog odjeljenja Suda Bosne i Hercegovine, kao i posebnog odjeljenja za ratne zločine, te posebnog odjeljenja za organizirani kriminal, privredni kriminal i korupciju Tužilaštva Bosne i Hercegovine – predlagač Predsjedništvo BiH;

6. Saglasnost za ratifikaciju Ugovora o zajmu (Regionalni program razvoja puteva) između Bosne i Hercegovine i Evropske banke za obnovu i razvoj - predlagač Predsjedništvo BiH;
7. Saglasnost za ratifikaciju Nota Sporazuma između guvernera Centralne banke Libije i ministra za međunarodnu saradnju BiH, SFRJ - predlagač Predsjedništvo BiH;
8. Saglasnost za ratifikaciju Protokola između Vijeća ministara BiH i Vlade Republike Turske o međusobnoj zamjeni nekretnina-zemljišta za izgradnju diplomatskih predstavništava u Sarajevu i Ankari - predlagač Predsjedništvo BiH;
9. Tekuća pitanja.

Dnevni red je jednoglasno usvojen.

### **Ad. 1. Usvajanje Zapisnika sa 33. sjednice Komisije**

Zapisnik sa 33. sjednice Komisije jednoglasno je usvojen.

### **Ad. 2. Prijedlog zakona o Javnom radio-televizijskom sistemu Bosne i Hercegovine – predlagač Vijeće ministara BiH**

Predsjedavajući Komisije, g. Čengić, upoznao je članove Komisije sa procedurom koju je Prijedlog zakona prošao da bi ga Komisija razmatrala kao nadležna:

Vijeće ministara BiH, kao ovlaštenu predlagača, dostavilo je 09. 02. 2005. godine Parlamentarnoj skupštini BiH pomenuti Prijedlog zakona na razmatranje u parlamentarnu proceduru sa zahtjevom da se Prijedlog zakona razmatra po hitnom postopku, u skladu sa članom 99. Poslovnika Doma naroda.

Dom naroda Parlamentarne skupštine BiH, na svojoj 38. sjednici održanoj 22. 02. 2005. godine, razmatrao je i prihvatio zahtjev predlagača za razmatranje prijedloga zakona po hitnom postupku u skladu sa članom 99. Poslovnika Doma naroda.

Ustavno-pravna komisija Doma naroda Parlamentarne skupštine BiH na svojoj 39. sjednici, održanoj 07. 03. 2005. godine zaključila je da je prijedlog zakona podnesen od ovlaštenog predlagača i da je u skladu sa Ustavom BiH, te da može ići u dalju parlamentarnu proceduru prema nadležnoj komisiji.

Komisija za vanjsku i trgovinsku politiku Doma naroda Parlamentarne skupštine BiH, u skladu sa članom 79. stav 2. Poslovnika Doma naroda razmatra je Prijedlog zakona kao nadležna komisija u osnovnom zakonodavnom postupku.

Uvodne napomene o Prijedlogu zakona, u svojstvu predstavnika predlagača, iznio je g. Šavija iz Ministarstva komunikacija i transporta.

Prisutnima se, zatim, obratio g. Ney koji je iznio preporuke OHR-a. Istakao je da Prijedlog zakona sa amandmanima usvojenim u Predstavničkom domu predstavlja kompromisno rješenje za sve tri strane, odnosno sva tri naroda. Dalja finansijska opterećenja koja

podrazumjevaju neki uloženi amandmani ne mogu se prihvatiti, a mandat korporacije morao bi ostati isti.

G. Humphryes je podsjetio da je usvajanje Zakona o javnom RTV sistemu jedan od neispunjenih uvjeta iz Studije izvodljivosti i Evropska unija neće ići dalje u procesu priključenja Bosne i Hercegovine dok se postavljeni uvjeti ne ispune. Neusvajanje ovog zakona predstavljalo bi prepreku za potpisivanje Sporazuma o stabilizaciji i pridruživanju.

U raspravi o načelima i principima, g. Čengić je istakao da je za njega prihvatljiv stav Delegacije Evropske komisije. On smatra da specifičnosti i prava konstitutivnih naroda moraju biti poštovana kroz ovaj Zakon.

G. Jukić smatra da nisu ispoštovana osnovna načela Ustava BiH, te da nisu prihvatljiva načela i principi na kojima je Zakon zasnovan. Takođe, nisu ispoštovani osnovni principi o jednakim pravima konstitutivnih naroda.

G. Spajić je rekao da načela i principi zakona nisu prihvatljivi.

Zaključeno je da se neće posebno glasati o principima i načelima nego da se glasanje o amandmanima ima smatrati i izjašnjavanjem o principima i načelima.

Zatim se prešlo na raspravu o amandmanima. Predsjedavajući g. Čengić je konstatirao da su podneseni sljedeći amandmani na Prijedlog zakona:

- Klub delegata hrvatskog naroda – 3 amandmana;
- Delegat Ruža Stojanović – 4 amandmana;
- Delegat Hasan Čengić – 6 amandmana;
- Klub delegata hrvatskog naroda – 10 amandmana;

### **Klub delegata hrvatskog naroda – 3 amandmana**

#### **AMANDMAN I.**

U članku 7. stavak 2. mijenja se i glasi:

“(2) Odbor Sustava sastoji se od deset članova, po tri iz reda konstitutivnih naroda i jedan iz reda ostalih. Odbor Sustava bira Parlamentarna skupština Bosne i Hercegovine na period od četiri godine. Odbor se bira nakon provedene procedure javnog natječaja koju raspisuje i provodi Regulatorna agencija za komunikacije i utvrđuje listu kandidata koji ispunjavaju uvjete.”

Amandman nije usvojen (2 glasa za, 4 glasa protiv).

#### **AMANDMAN II.**

U članku 9. stavak 2. mijenja se i glasi:

«(2) Vijeće ministara Bosne i Hercegovine obvezno je, najkasnije do 30.06.2006. osigurati sve financijske i tehničke uvjete za emitiranje programa Javnog BHRT servisa na tri kanala, radi ostvarivanja kolektivnih i pojedinačnih ljudskih prava konstitutivnih naroda i Ostalih, sukladno članku 10. Europske konvencije za zaštitu ljudskih prava i temeljnih sloboda i ciljeva utvrđenih programskim načelima iz članka 26. ovog Zakona.»

Amandman nije usvojen (2 glasa za, 4 glasa protiv).

### **AMANDMAN III.**

U članku 16. u trećem retku iza riječi "Regulatorne agencije" stavlja se točka, a sintagma »osim suspenzije i gašenja.« se briše.

Amandman nije usvojen (2 glasa za, 4 glasa protiv).

### **Delegat Ruža Stojanović – 4 amandmana**

#### **Amandman I**

U članu 10. tačka 4. iza riječi: «RTV servis» staviti zarez, a riječi: «koji će ograničiti prijenos svakog entitetskog servisa na području odgovarajućega entiteta u skladu sa članom 9. ovoga zakona» brisati.

Amandman je usvojen (4 glasa za, 1 glas suzdržan).

#### **Amandman II**

U članu 12. tačka 4. mijenja se i glasi:

«Korporacija ima organizacijske jedinice u Sarajevu, Banjoj Luci i Mostaru».

Amandman je usvojen (3 glasa za, 1 glas protiv, 2 glasa suzdržana).

#### **Amandman III**

U članu 29. iza tačke 4. dodati novu tačku 5., koja glasi:

«Produkcija programa svih žanrova za BHRT servis bit će jednako raspoređena između tri organizacijske jedinice.»

Amandman je usvojen (4 glasa za, 2 glasa suzdržana).

#### **Amandman IV**

U članu 42. tačka 6. u stavu (1) riječ «internog» zamijeniti riječju «javnoga», iza riječi «RTV servisa» staviti tačku, a ostatak rečenice brisati.

U istoj tački, stav (2) mijenja se i glasi: «Svi kandidati odabrani na nove pozicije moraju ispunjavati uslove iz opisa radnih mjesta koje donosi Uprani odbor Javnog RTV sistema».

Amandman je usvojen (4 glasa za, 1 glas suzdržan).

### **Delegat Hasan Čengić – 6 amandmana**

**Amandman I**  
**Član 6.**

Stav 3., paragraf c mijenja se i glasi:

«Promovira i odlučuje o standardima tehničkog razvoja i uvođenju novih tehnologija».

Amandman nije usvojen (2 glasa za, 3 glasa protiv).

**Amandman II**  
**Član 12.**

Stav 4. mijenja se i glasi:

4.a) Produkcija programa svih žanrova za BHRT FTV i RTRS servis bit će ravnomjerno raspoređena između svih organizacionih jedinica.

b) Sve organizacione jedinice Sarajevo, Banja Luka, Mostar, Bihać, Brčko, Bijeljina, Doboj, Goražde, Livno, Orašje, Srebrenica, Široki Brijeg, Travnik, Trebinje, Tuzla i Zenica, dužne su producirati u skladu sa svojim mogućnostima, programe za sve servise.

c) Sve organizacione jedinice, u nacionalnom sastavu svih uposlenika, moraju odražavati strukturu popisa stanovništva iz 1991.godine.

Amandman nije usvojen (2 glasa za, 4 glasa protiv).

**Amandman III**  
**Član 23.**

Mijenja se i glasi:

Član 23.  
Finansiranje

Glavni izvori finansiranja javnih servisa su rtv taksa, podržani sa prihodima od sponzorstva i oglašavanja.

RTV taksa:

1. RTV taksa u Bosni i Hercegovini se naplaćuje na području entiteta i Brčko Distrikta BiH, s tim što se uplata vrši na jedinstven račun.
2. Članovi Odbora sistema su povjerioci i izvršioci navedenog jedinstvenog računa i odgovorni su za nadzor nad postupkom naplate.
3. BHRT pripada (50%) procenata od ukupnog iznosa RTV takse naplaćene na teritoriji BiH.
4. RTFBIH pripada (25%) procenata od ukupnog iznosa RTV takse naplaćene na teritoriji BiH.
5. RTRS pripada (25%) procenata od ukupnog iznosa RTV takse naplaćene na teritoriji BiH.
6. Ovi omjeri raspodjele primjenjuju se bez obzira na način prikupljanja.

7. Organizacije koje naplaćuju RTV taksu u ime javnih RTV servisa dužni su uplatiti naplaćeni iznos RTV takse na jedinstven račun, bez odlaganja.
8. Raspodjela sredstava javnim RTV servisima sa jedinstvenog računa vršit će se odmah.

Prihodi od sponzorstva i oglašavanja:

1. Svakom RTV servisu pripada njegov prihod ostvaren od marketinga (oglašavanje i sponzorstvo).

Amandman nije usvojen (2 glasa za, 4 glasa protiv).

**Amandman IV**

**Član 26.**

Stav 3. postaje stav 3.paragraf a)

Stav 3.b, se dodaje i glasi:

b) Svaki od tri servisa(BH TV FTV i RTRS) će emitirati najmanje 5 sati sedmično programa iz kulture svakog od tri naroda: bošnjačkog, srpskog i hrvatskog; te 2 sata sedmično programa religijskog sadržaja iz islama, pravoslavlja i katoličanstva, te programu iz judeizma, vodeći računa o specifičnostima (religijskih sadržaja i kalendara). Stav 3.postaje stav 3. paragraf a).

Amandman nije usvojen (2 glasa za, 4 glasa protiv).

**Amandman V**

**Član 26.**

Stav 4. postaje stav 4. paragraf a).

Stav 4., b, c, d, e, se dodaje i glasi:

b) Program BHRT, obavezno će svakog dana biti «popunjavan» sadržajima iz svih organizacionih jedinica, a prema usklađenoj shemi. Novinari sa terena, i redakcijama, koristiće svoj maternji jezik (ijekavskog izgovora). Svi potpisani titlovi emitovaće se na zvničnim službenim jezicima kojim se govori u BiH, i na oba pisma, svakog dana naizmjenično.

c) Informativne emisije BHRT, posebno će voditi računa o jednakopravnoj zastupljenosti službenih jezika i oba pisma; prajm tajm od 17.30 do 22.30 biće dugoročno planiran.

d) Službeni jezici: bosanski, hrvatski i srpski, (ijekavskog izgovora) moraju biti lingvistički i sintaktički usklađeni sa jezičkim standardima sa zemljama u okruženju (Hrvatska i SiCG).

e) Na programu BHRT strogo će se voditi računa o ravnopravnosti titlovanja filmova i serija, na službenim jezicima i na oba pisma.

Amandman nije usvojen (2 glasa za, 4 glasa protiv).

**Amandman VI**

## Član 42.

Dodaju se: stav 9. i 10. i glase:

9. BHRT će u roku od 5 godina, od usvajanja ovog i Zakona o BHRT servisu emitovati 24 satni program, uvažavajući vrijeme u eteru za evropske programe, koji moraju biti u skladu sa članom 6. EU Direktive «tv bez granica», ne računajući vrijeme za vijesti, sportske događaje, zabavu, oglašavanje i usluge teleteksta i teleshoppinga.
10. Sve organizacione jedinice, moraju u roku od 5 godina biti potpuno osposobljene, za nesmetanu proizvodnju za sve servise, domaćih žanrova: informativnih, kulturnih, sportskih, religijskih, dokumentarnih, te posebno tradicijskih programa.

Amandman nije usvojen (2 glasa za, 4 glasa protiv).

### **Klub delegata hrvatskog naroda – 10 amandmana**

#### **AMANDMAN I.**

U članku 1. stavku (1) riječ «tri» zamjeniti riječju «četiri», te isto učiniti u sljedećim člancima 2, 6, 10, 12, 13, 14, 18 i 42.

Amandman nije usvojen (2 glasa za, 2 glasa protiv, 1 glas suzdržan).

#### **AMANDMAN II.**

U članku 3. stavku (1) točka b) se mijenja i glasi: b) Radio-televizija Federacije Bosne i Hercegovine – Sarajevo (u daljnjem tekstu: RTVFBiH – Sarajevo) kao javni RTV servis Federacije Bosne i Hercegovine na bosanskom jeziku.

Točka c) se mijenja i glasi: »Radio-televizija Federacije Bosne i Hercegovine – Mostar (u daljnjem tekstu: RTVFBiH – Mostar) kao javni RTV servis na hrvatskom jeziku».

Dosadašnja točka c) postaje točka d), koja glasi:

« Radio-televizija Republike Srpske ( u daljnjem tekstu: RTRS – Banja Luka ) kao Javni RTV servis Republike Srpske na srpskom jeziku «.

Dosadašnja točka d) postaje točka e).

Točka (2) mijenja se i glasi: “Zakoni o BHRT, RTVFBiH – Sarajevo, RTVFBiH – Mostar i RTRS – Banja Luka bit će usklađeni sa odredbama ovog zakona».

Amandman nije usvojen (2 glasa za, 2 glasa protiv, 1 glas suzdržan).

#### **AMANDMAN III.**

U članku 7. stavak (2) broj 12 zamijeniti brojem 16.

Amandman nije usvojen (2 glasa za, 2 glasa protiv, 1 glas suzdržan).

#### **AMANDMAN IV.**

U članku 8. stavak (3) broj 7 zamijeniti brojem 9.

Amandman nije usvojen (2 glasa za, 2 glasa protiv, 1 glas suzdržan).

#### **AMANDMAN V.**

U članku 9. stavak (1) na kraju drugog retka i u trećem retku riječ «dvije» zamijeniti riječju «tri». Stavak (2) mijenja se i glasi: «(2) Vijeće ministara Bosne i Hercegovine, zajedno sa Vladom Federacije Bosne i Hercegovine, obvezno je, najkasnije u roku od godine dana od stupanja na snagu ovog zakona, osigurati sve financijske i tehničke uvjete za uspostavu javnog RTV servisa Federacije Bosne i Hercegovine na hrvatskom jeziku, sukladno članku 3. točka (1) c) ovog zakona».

Amandman nije usvojen (2 glasa za, 2 glasa protiv, 1 glas suzdržan).

#### **AMANDMAN VI.**

– Isti kao amandman delegata Ruže Stojanović, već je usvojen, te se o njemu nema potrebe ponovo izjašnjavati

#### **AMANDMAN VII.**

U članku 12. stavku (1) tekst u zagradi zamijeniti tekстом «(BHRT, RTFBiH – Sarajevo, RTFBiH – Mostar i RTRS)».

U stavku (4) na kraju dodati i Mostar.

Amandman nije usvojen (2 glasa za, 2 glasa protiv, 1 glas suzdržan).

#### **AMANDMAN VIII.**

U članku 15. stavak (1) točka n) poslije riječi sustava, dodati «direktor BHRT».

Amandman nije usvojen (2 glasa za, 2 glasa protiv, 1 glas suzdržan).

#### **AMANDMAN IX.**

U članku 23. u stavku (4) poslije riječi «RTFBiH» dodati « – Sarajevo» i broj 25 zamijeniti brojem 20.

Stavak (5) mijenja se i glasi: «RTFBiH – Mostar pripada (20%) postotaka neto prihoda od marketinškog oglašavanja i (20%) postotaka od ukupnog iznosa RTV pristojbe naplaćene na teritoriju Bosne i Hercegovine».

Dosadašnji stavak (5) postaje stavak (6) i u njemu brojka 29 se zamjenjuje brojkom 20.

Dosadašnji stavak (6) postaje stavak (7) i brojka 50 se zamjenjuje brojkom 40.

Amandman nije usvojen (2 glasa za, 2 glasa protiv, 1 glas suzdržan).



## AMANDMAN X.

U članku 26. stavak (3) u točki 4) riječi «javnih RTV servisa» zamijeniti riječju «BHRT», a u točki 5) riječi «javni RTV servisi» zamijeniti riječju «BHRT-a».

Amandman nije usvojen (2 glasa za, 2 glasa protiv, 1 glas suzdržan).

Nakon toga, Komisija je većinom glasova (4 glasa za, 2 glasa protiv) usvojila Prijedlog zakona sa usvojenim amandmanima i uputila ga Domu naroda u dalju parlamentarnu proceduru.

### **Ad. 3. Prijedlog zakona o željeznicama Bosne i Hercegovine - predlagač Vijeće ministara BiH**

Predsjedavajući Komisije, g. Čengić, upoznao je članove Komisije sa procedurom koju je Prijedlog zakona prošao da bi ga Komisija razmatrala kao nadležna:

U osnovnom zakonodavnom postupku komisijske faze, Komisija za vanjsku i trgovinsku politiku Doma naroda Parlamentarne skupštine BiH, u skladu sa članom 79. stav 2. Poslovnika Doma naroda razmatrala je Prijedlog zakona o željeznicama Bosne i Hercegovine čiji je predlagač Vijeće ministara BiH. Vijeće ministara BiH, kao ovlašteni predlagač, dostavilo je 09. 03. 2005. godine Parlamentarnoj skupštini BiH pomenuti Prijedlog zakona na razmatranje u parlamentarnu proceduru sa zahtjevom da se Prijedlog zakona razmatra po hitnom postupku, u skladu sa članom 99. Poslovnika Doma naroda.

Dom naroda Parlamentarne skupštine BiH, na svojoj 40. sjednici, održanoj 25. 04. 2005. godine, razmatrao je i prihvatio zahtjev predlagača za razmatranje prijedloga zakona po hitnom postupku u skladu sa članom 99. Poslovnika Doma naroda.

Ustavno-pravna komisija Doma naroda Parlamentarne skupštine BiH na svojoj 40. sjednici, održanoj 12. 05. 2005. godine zaključila je da je prijedlog zakona podnesen od ovlaštenog predlagača i da je u skladu sa Ustavom BiH, te da može ići u dalju parlamentarnu proceduru prema Komisiji za vanjsku i trgovinsku politiku.

U svojstvu predstavnika predlagača, o Prijedlogu zakona govorio je g. Koprivica. U diskusiji povodom zakona istaknuto je da su ponuđena dobra zakonska rješenja, a cilj podnosilaca amandmana je bio da se neke odredbe preciziraju.

Članovi Komisije su, zatim, jednoglasno podržali principe i načela Prijedloga zakona.

Predsjedavajući je konstatirao da su amandmane na Prijedlog zakona uložili delegati Vinko Radovanović (jedan amandman) i Osman Brka (devet amandmana), kako slijedi:

### **Amandman I**

U članu 5. iza stava (5) dodaje se novi stav (6) koji glasi: “Sjedište Regulatornog odbora je u Doboju”.

Amandman je usvojen većinom glasova (5 glasova za, 1 glas protiv).

## **Amandman II**

### **Član 8.**

Stav 1. paragraf 1. iza riječi "željeznicama" stavlja se tačka, a preostali dio teksta se briše.

Amandman je jednoglasno usvojen.

## **Amandman III**

### **Član 8.**

Stav A, paragraf 3. se briše.

Amandman je jednoglasno usvojen.

## **Amandman IV**

Stav A, paragraf 4. brisati riječi: «ili na vlastitu inicijativu», ostatak teksta oistaje isti.

Amandman je jednoglasno usvojen.

## **Amandman V**

### **Član 12.**

Stav 1. tačka a) u drugoj rečenici briše se riječ "značajna".

Amandman je jednoglasno usvojen.

## **Amandman VI**

### **Član 20.**

Stav 1. tačka 2. nakon prve rečenice koja se završava riječima: "željezničku infrastrukturu", ostatak teksta ove tačke se briše.

Amandman je jednoglasno usvojen.

## **Amandman VII**

### **Član 25.**

Nakon posljednjeg stava dodaje se novi stav i glasi: "Pregovori iz prethodnog stava moraju se završiti najkasnije za osamnaest (18) mjeseci od dana donošenja ovog zakona".

Amandman je jednoglasno usvojen.

## **Amandman VIII**

### **Član 25.a**

se dodaje i glasi:

Izuzetno od člana 12. stav 1. tačka a) u periodu od pet godina od stupanja na snagu ovog zakona, postojeće željezničke kompanije (J.P. Željeznice Federacije BiH i Akcionarsko društvo Željeznice R.S.) mogu imati određena dugovanja po osnovu neplaćenog poreza ili doprinosa, o čemu će precizne odredbe donijeti Regulatorni odbor željeznica BiH.

Amandman je jednoglasno usvojen.

## **Amandman IX**

### **Član 26.**

Nakon prvog stava dodaje se drugi stav koji glasi: "Pregovori iz prethodnog stava moraju se završiti najkasnije za osamnaest (18) mjeseci od dana donošenja ovog zakona".

Amandman je jednoglasno usvojen.

## **Amandman X**

### **Član 8., 21. i 22.**

U članu 8. C. stav 2., član 21. stav 2. tačka c), d) i e), i članu 22. stav 1. i 2. brišu se riječi "generalni" u odgovarajućem padežu.

Amandman je jednoglasno usvojen.

Komisija je jednoglasno prihvatila tekst Prijedliga zakona sa usvojenim amandmanima, uz konstataciju da je zakon neophodno donijeti, te predlaže Domu naroda Parlamentarne skupštine BiH njegovo usvajanje.

### **Ad. 4. Prijedlog zakona o Službi za poslove sa strancima – predlagač Vijeće ministara BiH**

Predsjedavajući Komisije, g. Čengić, upoznao je članove Komisije sa procedurom koju je Prijedlog zakona prošao da bi ga Komisija razmatrala kao nadležna:

U osnovnom zakonodavnom postupku komisijske faze, Komisija za vanjsku i trgovinsku politiku Doma naroda Parlamentarne skupštine BiH, u skladu sa članom 79. stav 2. Poslovnika Doma naroda razmatrala je Prijedlog zakona o Službi za poslove sa strancima čiji je predlagač Vijeće ministara BiH. Vijeće ministara BiH, kao ovlaštenu predlagača, dostavilo je 05. 02. 2005. godine Parlamentarnoj skupštini BiH pomenuti Prijedlog zakona na razmatranje u parlamentarnu proceduru sa zahtjevom da se Prijedlog zakona razmatra po hitnom postupku, u skladu sa članom 99. Poslovnika Doma naroda.

Dom naroda Parlamentarne skupštine BiH, na svojoj 38. sjednici održanoj 22. 02. 2005. godine, razmatrao je i prihvatio zahtjev predlagača za razmatranje prijedloga zakona po hitnom postupku u skladu sa članom 99. Poslovnika Doma naroda.

Ustavno-pravna komisija Doma naroda Parlamentarne skupštine BiH na svojoj 39. sjednici, održanoj 07. 03. 2005. godine zaključila je da je prijedlog zakona podnesen od ovlaštenog predlagača i da je u skladu sa Ustavom BiH, te da može ići u dalju parlamentarnu proceduru prema Komisiji za vanjsku i trgovinsku politiku.

Članovi Komisije su jednoglasno podržali principe i načela Prijedloga zakona.

Predsjedavajući je konstatirao da su amandmane na Prijedlog zakona uložili delegati Osman Brka (pet amandmana) i Boško Šiljegović (šest amandmana), kako slijedi:

- **Delegat Osman Brka – 5 amandmana**

**Amandman I**

Član 2.

Stav (2), nakon riječi: “osnovama” stavlja se tačka a ostatak teksta se briše.

Amandman je jednoglasno usvojen.

**Amandman II**

Član 3.

Stav (6), paragraph a) iza riječi “saznanja”, dodaju se riječi “iz nadležnosti Službe”.

Amandman je jednoglasno usvojen.

**Amandman III**

Član 16.

Stav (2), umjesto riječi “sedam”, staviti riječ “tri”, ostatak teksta ostaje isti.

Predlagač je odustao od amandmana.

**Amandman IV**

Član 23.

U stavu (1) iza riječi “izvršava” dodati riječ “druge”, a umjesto riječi “prenese” staviti riječ “povjeri”.

Amandman je jednoglasno usvojen.

**Amandman V**

Član 28.

Stav 1) umjesto riječi «vrši», staviti riječ «odobrava», ostatak teksta ostaje isti.

Predlagač je odustao od amandmana.

- **Delegat Boško Šiljegović – 6 amandmana**

**Amandman I**

**(na član 5.)**

U stavu 2. prvi red iza riječi "zamjenik direktora» umjesto veznika "i" stavlja se zarez, a tekst se mijenja i glasi:

"pomoćnik direktora za unutrašnju kontrolu i načelnik Službe".

U istom članu stav 3. se briše.

Amandman je jednoglasno usvojen.

**Amandman II**

**(na član 5.)**

U stavu 2. drugi red iza "službe" tekst se mijenja i glasi:

"te odjeljenja uspostavljena Pravilnikom o unutrašnjoj organizaciji i sistematizaciji Službe"

U istom članu stav 3. se briše.

Amandman je jednoglasno usvojen.

**Amandman III**

**(na član 9.)**

Poslije stava 1. dodaje se novi stav koji glasi:

"Direktor, zamjenik direktora i pomoćnik direktora za unutrašnju kontrolu ne mogu biti iz reda istog naroda."

Stav 2. postaje stav 3.

Amandman je jednoglasno usvojen.

**Amandman IV**

**(na član 24.)**

Tekst člana 24. se mijenja i glasi:

"Član 2.

Pomoćnik direktora za unutrašnju kontrolu

(1) Pomoćnik direktora za unutrašnju kontrolu za svoj rad odgovara direktoru Službe.

(2) Pomoćnik direktora za unutrašnju kontrolu, između ostalo, odgovara za:

- a) Planiranje i vršenje redovnih i vanrednih inspekcija u sjedištu Službe, organizacionim jedinicama i pojedinicama,
- b) Predlaganje aktivnosti u cilju otkrivanja i sprečavanja ispravnosti u radu pripadnika Službe,
- c) Predlaganje mjera i radnji koje predstavljaju rezultate sprovedenih unutrašnjih istraga i ispitivanja tačnosti navoda iz predavki i žalbi u vezi sa postupanjem pripadnika Službe,
- d) Saraduje sa drugim organizacionim jedinicama Službe,
- e) Obavlja i druge poslove iz nadležnosti Službe koje mu odredi direktor Službe.

(3) Dužnosti i odgovornosti pomoćnika direktora za unutrašnju kontrolu detaljnije se utvrđuju Pravnikom o unutrašnjoj organizaciji i sistematizaciji Službe."

Prethodni član 24. postaje član 25. i svi ostali članovi se pomjeraju za jedan.

Amandman je jednoglasno usvojen.

### **Amandman V**

(na član 25.)

U naslovu člana umjesto veznika "i" stavlja se zarez, a dodaje na kraju "i pomoćnika direktora za unutrašnju kontrolu".

Iste promjene se vrše u stavovima 1. i 2. ovog člana.

Takođe iste promjene se vrše i u stavku 1. člana 27., stavu 1. i stavu 2. člana 32., te u članu 34.

Amandman je jednoglasno usvojen.

### **Amandman VI**

(na član 26.)

U naslovu člana umjesto veznika "i" stavlja se zarez, a dodaje na kraju "i pomoćnika direktora za unutrašnju kontrolu".

Poslije stava 2. dodaje se stav 3. koji glasi:

"Pored opštih uslova utvrđenih Zakonom, kandidat za pomoćnika direktora za unutrašnju kontrolu mora imati visoku stručnu spremu (VSS), završen fakultet društvenog smjera, pet godina radnog iskustva od četa tri godine radnog iskustva provedenog na poslovima vezanim za kretanje i boravak stranaca".

Amandman je jednoglasno usvojen.

Komisija je jednoglasno prihvatila tekst Prijedloga zakona sa usvojenim amandmanima, uz konstataciju da je zakon neophodno donijeti, te predlaže Domu naroda Parlamentarne skupštine BiH njegovo usvajanje.

**Ad. 5. Saglasnost za ratifikaciju Sporazuma između Visokog predstavnika za Bosnu i Hercegovinu i Bosne i Hercegovine o uspostavi Ureda registrara Odsjeka i za ratne zločine i Odsjeka II za organizirani kriminal, privredni kriminal i korupciju krivičnog i apelacionog**

**odjeljenja Suda Bosne i Hercegovine, kao i posebnog odjeljenja za ratne zločine, te posebnog odjeljenja za organizirani kriminal, privredni kriminal i korupciju Tužilaštva Bosne i Hercegovine – predlagač Predsjedništvo BiH**

Članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

**Ad. 6. Saglasnost za ratifikaciju Ugovora o zajmu (Regionalni program razvoja puteva) između Bosne i Hercegovine i Evropske banke za obnovu i razvoj - predlagač Predsjedništvo BiH**

Članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

**Ad. 7. Saglasnost za ratifikaciju Nota Sporazuma između guvernera Centralne banke Libije i ministra za međunarodnu saradnju BiH, SFRJ - predlagač Predsjedništvo BiH**

Članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

**Ad. 8. Saglasnost za ratifikaciju Protokola između Vijeća ministara BiH i Vlade Republike Turske o međusobnoj zamjeni nekretnina-zemljišta za izgradnju diplomatskih predstavništava u Sarajevu i Ankari - predlagač Predsjedništvo BiH**

Članovi Komisije su jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

**Ad. 9. Tekuća pitanja**

Članovi Komisije su dogovorili da se na narednoj sjednici Komisije razmatraju prijedlozi zakona za koje je predlagač delegat Tomislav Limov.

Predsjedavajući Komisije

Hasan Čengić